

ሚኪያሴ ማፃኣፖ ዓይያ ካር

ጾኑሲ ማሊያ ኬኤዛ ሚኪያሴ ጾኑሲ ማሊያ ኬኤዛ ዒሲያሴ ናንጌ ዋደና ዓኣያ ማዓዛ ሸይንታ ዒዛኮ ደኣሎ ዛሎ ዪሁዳ ካኣቲ ዓጮ ዴማ ዓኣ ፔቲ ዳካ ካታማሰከኖይዳኬ። ጾኑሲ ማሊያ ኬኤዛ ዓሞዴ ኬደ ዛሎ ካኣቶ ዓጮ ባይሲንታ ሄላንዳሢ ኬኤዜሢሂጉዲ ሚኪያሴያኣ ዪሁዳ ካኣቲ ዓጮ ባይሲንታ ሄላንዳሢ ጾኑሲ ማሊሢ ኬኤዜኔ፤ ዬይ ዒ ኬኤዜ ማሊያ ዴራ ማዳ ሻኣካያ ማዔ ፒዜ ዎጎ ዎቢሲያር ጾኑሲ ዴርይዳ ሜቶ ዔኪ ዬዓንዳሢ ዛሎ ላቲ ኬኤዜኔ፤ ያዲ ማዔያታቲያ ሚኪያሴ ኬኤዜ ጾኑሲ ማሊያይዳ ሴካ ቤርቲም ማዓንዳ ዎዛ ዓኣያ ማዔሢ ዔርዛ ሚርጌ ማላታ ዓኣያኬ።

ባሽና ኮሺ ዛገንታኒ ኮይሳ ቤዛ ጾኑሲ ቢታንቶኮ ዴማ ዓኣ ዓጮም ቢያ ኮሺ ማዓንዳሢ (4:1-4)፣ ዳውቲ ዜርፃፓ ዴኤፒ ካኣቲ ዔቃንዳሢና ዴርም ኮሹም ዒንጋንዳሢ (5:2-4)፣ ዬያጉዲ ሃሃ ዒሰራዔኤሌይዳ ጾኑሲ ማሊያ ኬኤዛዘንሢ ኬኤዜ ቃኣላ ቢያ ፔቲ ፓይዲዳ ኬኤዚንታ ሃይሴና ኩማያ ማዔሢ ዔርዛያኬ፤ ዬኖ ማሊያ ዓርቄ ፓይዴላ ሂዚ ጋዓያኬ፡-

«ዒዚ ኦጊዳፓ ኮዓሢ ኦኡኒ ፒዜ ማዔ ባኣዚ ማዳንዳጉዲ፣ ኮሺ ባኣዚ ማዳሢ ን ኮዓንዳጉዲ፣ ጾኑሲና ዎላ ጉቤ ዒናፓ ሽሌዔ ማዓሢና ሃንታንዳጉዲኬ።» (6:8)

ማፃኣፔላ ዲማ ዲማ ዓርቄ ባኮ

ናንገና ናንጋ ጎዳ ፔ ዴርይዳ ሜቶ ዓጋንዳሢ (1:1—2:11)

ሃጊ ማዓንዳ ዎዛ (2:12-13)

ጾኑሲ ፑርቶ ሱኡጎንታ ዒዛ ማሊያ ኬኤዛኔ ጌይ ሉኡቃ ዓሰንታይዳ ፑርታ ባኣዚ ዓጋንዳሢ (3:1-12)

ዒሰራዔኤሌ ዓጮ ዓኮይዳ ዓኪ ጌኤሺ ማኣሪ (4:1—5:15)

ዒሰራዔኤሌ ዓሰኮ ዳቢንታ ፔጋዴሢ (6:1—7:7)

ዴርኮ ጾኑሲ ባንሢ ማዒያ (7:8-20)

1 ዪሁዳ ዓጮ ካኣታ፣ ዒዮዓታሚንታ ዓካኣዜንታ ሂዘቋያሴንታ ካኣታዴ ዎደና ሞሬታ ካታም ዓሢ ጾኑሲ ማሊያ ኬኤዛ ሚኪያሴም

ሳማሪያና ዩሩሳሌምና ዛሎ ያኑሲ ፔጋሲ ዳዌያና ዒ ኬኤዜ ቃኣላ ያዲ ጋዒያኩ፡-

ሳማሪያና ዩሩሳሌምና ዩኤኪንታንዳ ሜቶ ዩኤፒ

2 ዒንሢ ሃይ ሜሌ ዴራ ቢያ ዋይዙዋቲ!

ዒንሢ ሳይይዳ ናንጋ ዓሳ ቢያ ሃያ ዒና ዔኪ ዋይዙዋቲ!

ናንገና ናንጋ ጎዳ ፔኤኮ ዲማዴ ጌኤዮ ማኣራፓ

ዒንሢኮ ማዶ ዒዳ ዒንሢ ዑፃ ማርካዳንዳ።።

3 ናንገና ናንጋ ጎዳ ዒዛኮ ዲማዴ ናንጎ ማኣራፓ ሙካንዳ፤

ዒዚ ኬዲ ሳይኮ ዴጌ ዴጌ ማዔ ቤዛ ሃንታንዳ።።

4 ዩሩ ዋዶና ሾፒ ታሚ ዓልቁሳሢጉዲ

ዋኣሢያ ዴጌ ቤሲዳፓ ሊካ ዋታሢጉዲ

ዲካ ዒዛኮ ቶኮ ዴማ ዓልቃንዳ፤

ዛራኣ ሾኦኪንታንዳ።።

5 ዩይ ቢያ ማዔሢ ያይቆኦይ ደቢንቶር፣ ዒሰራዔኤሌ ማኣር ጎሞርኬ፤ ዒሰራዔኤሌ ዴር ደቢሼሢ ያናዳይ? ሳማሪያ ካታሞቱዋዓዳ? ዩሁዳ ዴራ ሜሌ ያኦዞ ካኣሽኪ ጎሜ ማዳንዳጉዲ ማሃሢ ያናዳይ? ዩሩሳሌምቱዋዓዳ?

6 ዩያር ናንገና ናንጋ ጎዳ፡- «ሳማሪያ ታኣኒ ቦኦሊዳ ማኣሪ ዶዔያኮ ሹቺ ኩለንቲያጉዲ ማሃንዳ፤ ዋይኔ ቱኪንታ ጎሺ ቤሲ ዒዛ ማዓንዳ፤ ዩያ ካታሞኮ ዶዔ ሹጮ ዶኦቺ ታኣኒ ኮላሲ ዓርሣንዳ፤ ዒዛኮ ዓይያ ማሂ ማዦና ሹጮዋ ታኣኒ ደይሳንዳ።።

7 ዒዛ ካኣሽካ ሜሌ ያኦዞ ቢያ ሜቃንዳ፤ ዒዛኮ ጌኤዮ ማኣርሞ ዞኦዞ ኮኦማ ላኣላ ጨገሴ ባካ ቢያ ታሚና ሚቺንታንዳ፤ ዒዛ ካኣሽካ ሜሌ ያኦዞ ቢያ ታኣኒ ባይዛንዳ፤ ሳማሪያ ዩያ ዓርሲ ኮሾና ባኮ ቡኩሴሢ ዞኦዞ ኮኦሚያ ዛሎ ጨገሶያ ማሃኒኬ፤ ሃሢያ ዒዛኮ ሞርካ ዞኦዞ ኮኦሚ ዴንቆ ባኮ ዩያና ዴንቆያ ማሃንዳ።።»

ዩሁዳይዳ ሄላንዳ ባይሰንታ

8 ዩካፓ ሚኪያሴ፡- «ዩያ ዛሎር ታኣኒ <ዎኦ! ዎኦ!> ጌይ ዩኤካንዳ፤ ታኣኒ ያያያ ማዒያ ዔርዛኒ ዑሢ ካሎ ማዒ ቶኪ ጉሪ ሃንታንዳ፤ ዒዳ ዉኡኮጉዲ ታኣኒ ያኦላንዳ፤ ሃሃ ቱኡቴጉዲያ ዒላታንዳ።።

9 ሳማሪያኮ ኪፃ ፓፃኒ ዳንዳዓያቱዋሴ፤ ዩይ ሜታ ዩሁዳ ሄሌ፤ ታኣኮ ዴራ ቡኪንታ ዩሩሳሌም ጸኦኮዋ ኬሰኪ ሄላያ ማዓንዳ።።

1:1 2ካኣቶ. ማ 15:32—16:20፤ 18:1—20:21፤ 2ያኦሲ. ዓሃኬ 27:1-7፤ 28:1—32:33።

10 ጌቴ ጌይንታ ቤዛ ዓኣ ኑኡኮ ሞርኮም ኑና ሄሌ ማቶ ኬኤዚፖቴ፤ ዒኢካ ፔቴታፖ ዩኤኪፖቴ፤ ቤትፖፔራይዳ ዓኣ ኑ ዒጊኖ ባኣካ ጋዓንቴ ሲላላ ቡምባሊ ቡምባሊ ዩኤኩዋቴ!

11 ዒንሢ ሻፒራ ዴራ ዑሢ ካሎ፥ ዲዒንቴ ዓሲጉዲ ማዒ ቦርሲንቴ ዒኢና ፖኦኪ ዴንዲዋቴ፤ ፃዒናኣኔ ካታሞይዳ ናንጋ ዓሳ ካታማፓ ኬሰካኒ ጫርቃዓኬ፤ ቤትዔፄኤሌ ፔኤር ዩኤፒ ቤሲ ማዔሢሮ ዒንሢም ፑኖ ካይዚ ዒዛ ማዓኒ ዳንዳዑቀሴ።

12 ማርቴ ካታሞ ዴራ «ኮሺ ባኣዚ ኑኡም ሙካንዳኔ» ጌይ ሃጊ ማዓዋዛ ጌሣኔ። ናንጊና ናንጋ ጎዳ ጋዓንቴ ዩሩሳላሜይዳ ባይሲንታ ኬይሴኔ።

13 ዒንሢ፥ ላኪሽ ዓጮ ዓሳ ሳርጌሎ ፆይቶ ጎቻ ፓራሢ ጊኢጊሹዋቴ፤ ዒሰራዔኤሌ ዓሶኮ ጎሜ ማዔ ዓሳ ዒንሢኬ፤ ዩሩሳላሜ ዳቢሽ ዓሳኣ ዒንሢኬ።

14 ዪሁዳ ዴሬዮቴ! ዒንሢ ዓካሪ ሞሬሽት ጋኣቴ ጌይንታ ካታሞም ፆሎ ሽሚሶ ዒንጎ ባኣዚ ዒንጋንዳኔ፤ ዓክዚቤ ዴራ ዒሰራዔኤሌ ካኣቶ ጌሻንዳኔ።

15 ሜሪሳ ዴሬዮቴ! ፆሊ ዒንሢ ዓርቃንዳ ሞርኬ ዒንሢዳ ዔኪ ታኣኒ ዩዓንዳኔ፤ ዒሰራዔኤሌ ዓሶኮ ቦንቺንታ ሱኡጋ ዓዲላሜይዳ ዓኣ ዴኖ ዔታ ዓኣሺንታንዳኔ።

16 ዒንሢ ዪሁዳ ዓጮ ዓሳ! ናኣታ ዒንሢኮ ዲዒንቴ ዔውታንዳሢሮ ሃያ፥ ዒንሢ ሾኤ ናኣቶ ዛሎ ፆዩፆ ዔርዛኒ ቶኦኮ ጉኡሊንቱዋቴ፤ ቶኦካ ዒንሢኮ ዓዳ ሃሞፑሮ ቶኦኪጉዲ ቲልቤያ ማፖንጎ።

2

ማንቆ ዓሶ ሄርቂ ዋይሣ ዓሶ ሄላንዳ ፑርታ ባኣዚ

1 ፑርታ ማዶ ማዳኒ ማሊ ቱካዞንሢና ላሄ ቤዛ ዓኣፆ ጌኔ ማሊ ሱካዞንሢም ባዴዔ! ዩያ ማዳኒ ዔራቶ ዔያቶኮ ዓኣሢሮ ሳዓ ካራዛ ዔያታ ማሊ ቱኬ ባኮ ማዶይዳ ፔኤሻኔ።

2 ጎሺ ዓርቃኒ ኮዓፆ ሜሌ ዓሲሮ ዋልቁና ዔያታ ዔካኔ፤ ማኣሪ ዔካኒ ኮዓፆዋ ዋልቃዲ ዔካኔ፤ ዓሲ ዔኤቢኬ ጎዑዋፆ ሄርቂ ቆሎ ዔያታ ቡራኔ።

3 ዩያሮ ናንጊና ናንጋ ጎዳ ሂዚ ጋዓኔ፡- «ሃሢ ታኣኒ ዒንሢዳ ባይሲንታ ዔኪ ዩዓንዳኔ፤ ዩያ ባይሲንታፓ ፔቴታፖ ቶላኒ ዒንሢ ዳንዳዑቀሴ፤ ዩይ ሚርጌና ማቶ ዋዴ ማዓንዳሢሮ ፆቶርቂ ሃንታኒ ዒንሢ ዳንዳዒንዲዋሴ።

4 ዩይ ቢያ ማዓ ዎዶና ዓሳ ዒንሢ ኮኦኪንሢ ማሂ ሚኢጪ ዓማላንዳኔ፤ ዒንሢዳ ሄሌ ማታሢዳፓ ዔቄያና ሂዚ ጌይ ጎኔ ቃያያ ማሊሲ ቃያንዳኔ፡-

«ኦኡኒ ጋፒ ባይቄኔ!»
ናንገና ናንጋ ጎዳ ኑ ዴሮ ቆሎ ዔኬኔ፤
ዴኖ ኦኡኮ ኦና ዲዔ ዓሶም ገሸኬኔ።»

5 ዬያሮ ናንገና ናንጋ ጎዳኮ ዴሮ ባኣካ ዒፃ ዓጊ ዴኖ ገሸካንዳ ዒይጎ ዓሲያ ባኣያ ማዓንዳኔ።

6 ዔያቶኮ ያኦሲ ማሊያ ኬኤዛኔ ጋዓ ሉኡቃ ዓሳ፡- «ሎንሦ ሃይሴ ኬኤዚፖ፤ ዬያጉዴ ዳውሲንቲ ኦና ሄሊንዲዎኣሢሮ ዬያ ባኮ ዛሎ ሎንሦ ኬኤዚፖ» ታና ጋዓኔ።

7 ሃሣ ዔያታ፡- «ዒንሢ ያይቆኦና ናኣታ! ሃይ ጌይንታኒ ኮይሳያዳ? ናንገና ናንጋ ጎዳኮ ገቢ ዳንዳዒፃ ጋፒናኣኮዳ? ሃያ ዒ ማዳያዳ?» ጌይ ያኦጫኔ፤ ጎኔና ሃንቲፃ ፒዜ ማዔሢም ታኣኮ ቃኣላ ኮሺ ባኣዚ ማዲዎዓዳ?

8 ናንገና ናንጋ ጎዳ ሂዚ ጌይ ዔያቶም ማሃንዳኔ፡- «ታኣኮ ዴሮይዳ ሞርኬ ማዒ ዒንሢ ዔቄኔ፤ ያላፓ ማዒ ጉሙርቂንቲ ዒንሢ ባኣካ ኮሺና ሃንታ ዓሶ ዒንሢ ቡሬኔ፤

9 ታ ዴሮኮ ላኣሎ ዔያቶኮ ኮዠ ማኣሮና ዓኣ ቆሎናፓ ቤልኪሲ ዒንሢ ዳውሴኔ፤ ዔያቶኮ ናኣቶ ዒንሢ ታኣኮ ዓንጅና ቦንቾናፓ ቢያ ዎዴ ዲማሲ ዴይሣኔ።

10 ዔቁዎቲ፡ ዓኣዲዎቲ፤ ሃይ ቤዛ ዒንሢኮ ጎሞ ዛሎና ዒኢቲ ባይቄሢሮ ሃካፓ ሴካ ሃይካ ኮሺ ዒንሢ ናንጋኒ ዳንዳዒዎሴ።

11 «ሃይ ዴራ ኮዓሢ ለዎይኔ ዑሺና ማሌ ማሣ ዑሺያኣ ዒንሢም ጎዓንዳኔ» ጌይ ሉኡዙሞና ኬኤዛ ጌሻ ዓሲኬ።

12 «ዒሰራዔኤሌ ዴሬዮቴ! ማራታ ባርቶይዳ፡ ማራቶ ቆልማኣ ሄንቃ ቤዛ ቡኪንታሢጉዲ ዒሰራዔኤሌ ዴሮ ባኣካፓ ፒኢጫዲ ዓቴ ዓሶ ፔቲይዳ ታኣኒ ቡኩሳንዳኔ፤ ዓጩሎይዳ ዓሲ ማርጋንዳኔ።»

13 ሻሃ ካሮ ቡላሢ ቤርታ ቤርታ ዔያቶኮ ኬሰኬኔ፤ ዔያታኣ ዒኢና ኬሰኪ ዴንዳንዳኔ፤ ናንገና ናንጋ ጎዳ፡ ዔያቶ ዔኪ ዓኣዳ ካኣታሢ ቤርታ ቤርታ ዓኣዳንዳኔ።

3

ሚኪያሴ ዒሰራዔኤሌ ዓሶ ሱኡጎ ዞሪ ቆዴሢ

1 ዩካፓ ታኣኒ ሂዚ ጌዔኔ፡- «ዒንሢ ያይቆኦቤ ናኣቶ ሱኡጋ፡ ዒንሢ ዒሰራዔኤሌ ዓሰዎይሃ ዓሰ ወይዘዋቱ! ዒንሢ ፒዜ ዎጌ ዔራንዲያ ኮይሱዋዓዳ?

2 ዒንሢ ጋዓንቴ ኮሺ ባኣዚ ዒዲ፡ ፑርታ ባኣዚ ናሽኬኔ፤ ታ ዳሮኮ ዔዲ ዓኣንቴ ዒልዎ ዒንሢ ሹኬኔ፤ ዔያቶኮ ዓሽኮዋ ማጌፃፓ ዒንሢ ካሬኔ፤

3 ታ ዳሮኮ ዓሽኮ ዒንሢ ሙዔኔ፤ ዒልዎዎ ዔያቶኮ ዑፃፓ ዒንሢ ሹኪ ዔቁሴኔ፤ ማጌፃዎ ቆዒ ዒንሢ ዔያቶኮ ማንሣኔ፤ ዓሽኪ ሻኣቆ ቦኦቆይዳ ሻኣቁንታሢጉዲ፡ ጊንሣ ሃሣ ዲሰቴይዳ ካሣኒ ቲቆሢጉዲ ዒንሢ ዔያቶ ቲቁኔ።

4 ዔያታ ናንጊና ናንጋ ጎዳ ባንሢ ማታዲ ዒላታንዳኔ፤ ዒዚ ጋዓንቴ ዔያቶም ወይዚ ማሃዓኬ፤ ዔያታ ማዴ ፑርቶ ማዲፓ ዔቁያና ዒዚ ዔያቶይዳፓ ፔኤኮ ዓኣፖ ካሮ ሺርሻንዳኔ።»

5 «ናንጊና ናንጋ ጎዳ ሉኡዘሞና ጾኦሲ ማላሢ ኬኤዛኔ ጋዓ ዓሰም፡- ዔያታ ዔኤቢ ዳንቃ ባኣዚ ዓኣ ጋዓዛ፡ ኦሽኪ ዒንሢም ማዓንዳኔ፤ ጌይ ኬኤዛኔ፤ ጋዓንቴ ዔኤቢ ዔያታ ዳንቁዋ ማዓ ወደና፡ «ዒንሢዳ ጾልዚ ሙካንዳኔ» ጌይ ዒላቲ ኬኤዚሢና ዳሮ ዔያታ ደቢሻኔ፤

6 ዩያሮ ዩያ፡ ጾኦሲ ማላጾ ሉኡዘሞና ኬኤዛ ዓሰም ሮኦራ ዲማንዳኔ፤ ዓቢ ጌሌም ዋንታ ዔያቶም ማዓንዳኔ፤ ሃካፓ ሴካ ጾኦሲ ፔጋሲ ዳዋ ባኣዚ ዔያታ ዛጋዓኬ፤ ሎንሃዎ ዔያታ ኬኤዛዓኬ።

7 ጾኦሲ ፔጋሲ ዳዋ ባኣዚ ኦ ዳንቃኔ፡ ሎንሃ ኦ ኬኤዛኔ፤ ጋዓ ባካ ቢያ ዔያቶም ጊኣጊንዲዋኣሢሮ ዔያታ ዳውሲንታንዳኔ፤ ናንጊና ናንጋ ጎዳ ዔያቶም ማሃ ኬኤዚንዲዋኣሢሮ ቦርሲንታፓ ዔቁያና ዓኣፖ ካሮ ፔኤኮ ዔያታ ኩቻ ዓርቁ፡ ሳዓ ዛጋንዳኔ።»

8 ታኣኒ ጋዓንቴ ያይቆኦቤም ዳቢንቶ፤ ዒሰራዔኤሌማኣ ጎሞ ኬኤዛንዲጉዲ ናንጊና ናንጋ ጎዳ ዓያና፡ ዎልቁ፡ ፒዘሞንታ ደዲሞዎ ታኣም ዒንጌኔ።

9 ዒንሢ ያይቆኦቤ ማኣሮ ሱኡጋ፡ ዒሰራዔኤሌ ማኣሮ ወይሃ ዓሳ፡ ፒዜ ዎጌ ቶኦቻ ዓሳ፡ ፒዜ ማዔ ባኮ ቢያ ዎቢሻ ዓሳ! ወይዘዋቱ፤

10 ዒንሢ ዓሲ ወዲሢና ጸዮኔ፡ ጌኔ ማዶና ዩሩሳላሜ ማዣ ዓሲኬ።

11 ካታሚሎኮ ደኦሪንቴ ዓሳ ዎጋሢ ዳሚና ዔኮ ሚኢሽ ዔኪኬ፤ ቁኤሳኣ ዔኮ ባኣዚ ዔኩዎፃ ዓሰ ዔርዘዋሴ፤ ጾኦሲ ማላጾ ኬኤዛ ዓሳኣ ሚኢሽ ባኣንቴ ሎንሃ ኬኤዘዋሴ፤ ዩይ ቢያ ማዲንታንቴ

ዔያታ፡- «ናንገና ናንጋ ጎዳ ኑኡና ዎላ ዓአሢሮ ዓይጎዎ ማፃሞ ፑርታ ባአዚ ኑና ሄላዓኬ» ጌይ ናንገና ናንጋ ጎዳና ዔያታ ሄርሺንታኑ።

12 ዔያሮ ዒንሢ ማዳ ፑርቶ ባኮሮ ዪዮኔ ዓዳ ጎሺጉዲ ጎሽታንዳኔ፤ ዩሩሳላሜኮዎ ማአሮ ዶዒያ ሹጫ ኩላ ማዓንዳኔ፤ ጌኤዡ ማአራ ማዡንጉቴ ቤዛአ ዲሚ ካይዚ ማዓንዳኔ።

4

ኮሹማ ሚርጋንዳ ያኦሲ ካአቱማ ሙካንዳሢ
(ዒ.ሲ. 2:1-4)

1 ጋፒንያ ዎድና

ናንገና ናንጋ ጎዳኮ ጌኤዡ ማአራ ማዡንጉቴ ዲካ
ሜሌ ዲኮ ቢያይዳፓ ዑሣ ባሺ ዪዳንዳኔ፤
ጌሜሮ ጉቤሢዳፓአ ኮሺ ዳግ ጋዓንዳኔ፤
ሜርጌ ዴሮ ካአታ ዒዛ ባንሢ ጎዓንዳኔ።

2 ዔያሮ ዴራ ሚርጌሢ፡-

«ዎጌ ዪዮኔይዳፓ፣ ናንገና ናንጋ ጎዳኮ ቃአላ ዩሩሳላሜይዳፓ
ዪዳሢሮ

ሃኒ ሙኩዎቴ፣ ናንገና ናንጋ ጎዳኮ ዲኮ ኑኡኒ ኬሰኮሞ፤
ያይቆኦይ ያኦሲኮ ጌኤዡ ማአራ ኑ ዓአደሞ፤

ዒዚ ፔ ማሊያ ኑ ኩንሣንዳጉዲ ኑና ዔርዛንዳኔ፤
ኑኡኒያ ዒዛ ጎይያ ዴንዳንዳኔ» ጋዓንዳኔ።

3 ዒዚ ሚርጌ ሜሌ ዴሮ ባአካ ዎጋንዳኔ፤

ሃኬና ዑኬናይዳ ዓአ ዴኤፖ ካአቶ ባአካ
ዓአ ዲማዲያ ፔቴ ማሂ ገአገሻንዳኔ፤

ዔያሮ ዔያታ ፔኤኮ ጨንቾ ዓፓሮ ማራሻ
ዎርዎዎ ዔያታ ባአቺ ማሂ ዲይሳንዳኔ።

ካአታ ዎሊዳ ያልዚ ያላቂሳዓኬ፤
ዩካፓ ያልዚ ያሎ ጎይሢ ዔራኒ ኮዓንዳ ዓሲያአ ባአሴ።

4 ፔቴ ፔቴ ዓሳ ፔ ቱኬ ዎይኖና

ቤሌሶ ሚያኮ ሺባ ዴይ ኮሺና ሃውሻንዳኔ፤
ዔያቶ ዒጊቻንዳ ባአዚያአ ባአሴ፤

ቢያ ባኮ ዎይሣ ጎዳሢ ዔያ ጌዔኔ።

5 ሜሌ ዴራ ቢያ ፔኤኮ ሜሌ ሜሌ ያኦዙ ካአሽካንዳኔ፤ ኑኡኒ
ጋዓንጉቴ ናንገና ናንጋ ጎዳ ማዔ ኑ ያኦዛሢ ካአሽኪ ናንጋንዳኔ።

ዲሰራዔኤሌ ዳርኮ ዳውሲንቴ ቤዛፓ ማዒያ

6 ናንጊና ናንጋ ጎዳ፡- «ዬኖ ኬሎና ዋቦ ዓሶንታ ታኣኒ ማቶ ዔያቶይዳ ዓገሞ ዳውሲንቴ ዳንዲ ማታኣ ኬዴ ታ ዳሮ ታኣኒ ቡኩሳንዳኔ።»

7 ዋቦ ዓሳ ፒኢጫዲ ዓታንዳጉዲ ታ ማሃንዳኔ፤ ዋለንቴ ዓኣዘንሢያ ዶዲ ዳሬ ታኣኒ ማሃንዳኔ፤ ታኣኒያ ጂዮኔ ዲኮይዳ ዬኖ ኬላፓ ዓርቃያ ናኣናና ዔያቶ ዑፃ ካኣታዳንዳኔ።» ጋዓኔ።

8 ኔኤኒ ዒዛኮ ቆልሞ ዳዒ ሄንቆ ሴኤላሢያ! ጂዮኔ ዉዲሮ ናኣቶኮ ጌሜራሢያ! ኔኤኒ ሚናዎይሣ ዓጫ ኔኤሞ ማዓንዳኔ፤ ኔኤኮ ካኣቱሞ ቢታንታኣ ጊንሣ ማዓንዳኔ።

9 ሃያይዲ ዳጊዲ ኔኤኒ ዒላታሢ፣ ሾይቺ ዓርቄ ላኣሊጉዲ ኔኤኒ ማታዳሢ ዓይጎሮዳይ? ኔኤኮ ካኣቱ ባኣሢሮዳ? ሃንጎ ኔኤኮ ዘራ ዓሳ ቢያ ባይቄሢሮዳ?

10 ዬሩሳላሜ ዳሬዮቴ! ሾይቺ ዓርቄ ላኣሊጉዲ ማታዳዎቴ፤ ሃሢ ዒንሢ ካታማፓ ዳውሲንቴ ኬሰኪ ቦኦላ ዲንኪ ዳዓንዳኔ፣ ባብሎኔ ዓጮዎ ዒንሢ ዳንዳንዳኔ፤ ዒኢካ ናንጊና ናንጋ ጎዳ ዒንሢ ዳቂሻንዳኔ፤ ሞርኮ ኩጫፓኣ ዒንሢ ዒ ዓውሳንዳኔ።

11 ሃሢ ጋዓንቴ ሚርጌ ሜሌ ዳሬ ዒንሢ ባይዛኒ ቡኪንቴ፡- «ዬሩሳላሜ ዒኢቲያ ማዖንጎ! ኑ ዒዛኮ ሻሂንቴ ባይቄያ ዛጎሞ!» ጋዓኔ።

12 ዬያታ ዳራ ጋዓንቴ ናንጊና ናንጋ ጎዳኮ ማሊያ ዔሩዋሴ፤ ሸርኪንታ ሃኣኮ ቆይዳይዳ ኩሊንታሢጉዲ ዒዚ ዔያቶ ቡኩሲ ማታሳኒታሢ ዔያታ ዔሪባኣሴ።

13 ናንጊና ናንጋ ጎዳ፡- «ዒንሢ ዬሩሳላሜ ዳራ! ዓኣዲፓፓ ዒንሢኮ ሞርኮ ዓዳ ሃኣኮጉዲ ሸርኩዎቴ! ጉራና ዓንጊ፣ ሄርቃ ሹቁላ ሞኦና ዓንጊ ማዔ ጌማይጉዲ ዒንሢ ታኣኒ ዶዲ ማሃንዳኔ፤ ሚርጌ ሜሌ ዳርኮ ካኣቶ ዒንሢ ጋኣጫንዳኔ፤ ዔያታ ጌኔ ጎይሢና ቡኩሴ ቆልሞንታ ቆሎዎ ቢያ ዓጮ ቢያኮ ጎዳ ማዔ ታና፣ ዖኦሲሞ ዒንሢ ዔኪ ሸኢኣሻንዳኔ።» ጋዓኔ።

5

በኤቴሌሃሜይዳፓ ሱኡጌ ኬሰካንዳያ ማዒያ ኬኤዚንቴሢ

1 «ዒንሢ ዬሩሳላሜ ዳራ! ሃሢ ኑኡኒ ሞርኬና ማንጊንቴሢሮ፣ ዲሰራዔኤሌ ዓሶ ሱኡጋሢኮዎ ጋንጋራ ኩኦሎና ጳርቂንታኒታሢሮ ዒንሢኮ ዖሎ ዓሶ ፔቴይዳ ጊኢጊሺ ዔቁሱዎሴ።»

2 ናንጊና ናንጋ ጎዳ፡- «ኔኤኒ፣ ዔፕራታይዳ ዓኣ በኤቴሌሃሜ ካታሜሌ! ዪሁዳ ዓጮይዳ ዓኣ ዳኮ ዳኮ ካታሞይዳፓ ፔቴዘ

እኔን ማዕታቴያ ሙካ ዒዛኮ ሚናኣፓ ዓርቃያ ናንገና ናንጋያ ማዕ።
ዒሰራዔኤሌ ዴር ዋይሣንዳ ሱኡጌ ታኣም ኬሰካንዳይ» ጋዓይ።

3 ዬያሮ ዒዛኮ ዒንዳ ዒዛ ሾዓንዳ ዋዳ ሄላንዳኣና ናንገና ናንጋ
ጎዳ ዴር ፔኤሲ ሃሻንዳይ፤ ዬካፓ ዳውሲንቲ ዴንዲ ዓኣ፤ ዒዛኮ
ዒገና ማዒ ሙኪ ዔያቶኮ ዒገናና ዋላ ሲኢሪንታንዳይ።

4 ዒዚ ሙካ ዋዶና ናንገና ናንጋ ጎዳፓ ጴዳ ዶዶሞና ዴኤፑሞና
ማራቶ ዒዚ ሄንቃንዳይ፤ ዒዚ ዬያ ማዳንዳሢ ሲንቲንቲ ናንገና ናንጋ
ጎዳ ማዕ ዒዛኮ ያኦዛሢ ሱንጾናኬ፤ ዴኤፑማ ዒዛኮ ሳያኮ ጋፓ
ሄላንዳኣና ዔርታንዳሢሮ ዒገና ዒዛኮ ሂርጋ ባኣያ ናንጋንዳይ።

5 ዒዚ ዔያቶም ኮሹሞ ዔኪ ሙካንዳይ።

ዓውሲሢና ማቶ ዓገሢና ዛላ

ዓሶኦሬ ዓሳ ኑ ዓጮ ያሊ ዓርቃኒ ሙኪ። ኦኡኮ ዋርዲዮ ኬኤሎ
ዲያ ገዔቴ ኦኡኮ ካፓ ዓሶ ላንኮና ሳሎ ሱኡጎና ኦ ዔያቶ ያሊሻንዳይ።

6 ናሞሩዴ ዓጮ ጌይንታ ዓሶኦሬ ዔያታ ፔኤኮ ያሎ ዓሶ ዋልቆና
ያሊ ባሺ ዓርቃንዳይ፤ ዓሶኦሬ ዓሳ ኦኡኮ ዓጮ ያሊ ባሺ። ዛጶና ኦኡኮ
ፒንቁቴያ ኦኡኮ ሱኡጋ ዔያቶ ኩጫፓ ኦና ዓውሳንዳይ።

7 ሃይባፓ ዓቴ ዒሰራዔኤሌ ዴራ ሚርጌ ማሌ ዴሬ ባኣካ
ናንገና ናንጋ ጎዳ ኬይሳ ያልኬና ማኣቲዳ ዋርቃ ፀብ ዒርዚናጉዲ
ማዓንዳይ፤ ዔያታ ጉሙርቂ ካፓንዳሢ ዓሲቱሞንቴ ናንገና ናንጋ ጎዳ
ሌሊ ማዓንዳይ።

8 ዬንሢ ሚታሢዳፓ ዓቴ ዒሰራዔኤሌ ዴርንሢ ሚርጌ ዴር
ማሌሢ ባኣካ ናንጋኣና ካይዚዳ ሲያ ኬሚ ናንጋ ዘቢጉዲ ማዓንዳይ፤
ዬያጉዲ ሃሣ ዔያቶ ዓውሳ ዓሲባኣ ማራቶ ባኣኮ ዔርቱሞንቴ ጌሊ
ማንሢ ሸኦሊ ሙዓ ሃገ ዔቃ ዘቢጉዲ ማዓንዳይ።

9 ዒሰራዔኤሌ ዓሳ ፔኤኮ ዶዶ ዋልቆና ሞርኮ ያሊ ባይዛንዳይ።

10 ናንገና ናንጋ ጎዳ፡- «ቤርታዲ ጋዓንቴ ታኣኒ ፓራሢ ዒንሢ
ባኣካፓ ባይዛንዳይ፤ ሳርጌሎ ያይቶሞ ጋፒሲ ባይዛንዳይ።

11 ዒንሢኮ ዓጮይዳ ዓኣ ካታሞሞ ታኣኒ ሻሃንዳይ፤ ዋርዲዮ
ቤዞሞ ቢያ ታኣኒ ዶይሳንዳይ።

12 ማርሾ ታ ዒንሢኮ ባይዛንዳይ፤ ዓማቶ ማዒ ማዳ ዓሲያኣ
ዒንሢ ባኣካ ጴዳዓኬ።

13 ዒንሢ ቆኦቂ ኮሺ ማሌ ያኦዛንታ ዒንሢ ዚጋ ዳኣቦ ዒንሢ
ባኣካፓ ታኣኒ ባይዛንዳይ፤ ዒንሢ ኩቻ ኮሺ። ማሌ ያኦዞም ሃካፓ
ሴካ ዒንሢ ዚጋዓኬ።

5:2 ማቴ. 2:6፤ ዮሃ. 7:42። 5:6 ማገ. ማጻ 10:8-11።

14 ዓሸራኮ ማላቶ ታ ዒንሢ ዓጫፓ ቱገ ባይዛንዳኔ፤ ዒንሢኮ ካታሞቀ ታኣኒ ሻሃንዳኔ።

15 ታኣሞ ዓይሢንቶ ዒፄ ካኣቶ ቢያ ታኣኮ ጳኤፖ ጳጎና ኮሞ ታ ኮፃንዳኔ።»

6

ናንገና ናንገ ጎዳ ዒሰራዔኤሌ ዳሮሞ ጌዔ ባኮ

1 ናንገና ናንገ ጎዳ ዒሰራዔኤሌ ዳሮሞ ጋዓ ባኮ ዋይዙዋቱ፤

«ዔቁዋቱ! ዒንሢኮ ዓኣ ማሊያ ዲኮ ቤርታ ሸኢሹዋቱ! ጌሜራኣ ዒንሢ ጋዓ ባኮ ዋይዘንጎ።

2 ዒንሢ ሃይ ዲካ ናንገና ናንገ ጎዳ ፔ ዳሮሞ ጋዓ ባኮ ዋይዙዋቱ! ሃሃ ዒንሢ ዶዲ ማዔ፥ ሳዖኮ ፃጳኣ ዋይዙዋቱ! ናንገና ናንገ ጎዳ ፔኤኮ ዳሮ ዒሰራዔኤሌ ዓሶኮ ዳቢንቶ ኬኤዚ ኬኤዚ ጎራኔ።»

3 ናንገና ናንገ ጎዳ፡- «ታ ዳራዮቱ! ታ ዒንሢ ዋዎይይ? ታ ዒንሢሞ ዳኤዒሴ ባካ ዓይጎዳይ? ሂንዳ ታኣሞ ማሂ ኬኤዙዋቱ።

4 ገብፄ ዓጫፓ ታ ዒንሢ ኬሴኔ፤ ዓይላቶ ዓጫፓ ታ ዒንሢ ዓውሴኔ፤ ሙሴንታ ዓኣሮኔንታ ማይራሞንታ ዒንሢሞ ሱኡጌ ማሂ ታ ዒንጌኔ።

5 ታ ዳራዮቱ! ሞዓኣቤ ዓጫ ካኣቲ ባኣላኣቁ ዒንሢ ዋዳኒ ማሌቱ፥ ቢዖኦራ ናኣዚ ባኣላኣሜያ ማሂ ዒዛሞ ዋዚ ጌይ ኬኤዙቱ ሂንዳ ማሉዋቱ፤ ያኣሲ ዒሉሞ ማዶ ዒንሢ ዔራንዳጉዲ ሸዒሚይዳፓ ዔቁ ዒንሢ ጌልጌላ ዓኣዳ ዋዶና ጎይያይዳ ማዲንቲ ባኮ ቢያ ማሉዋቱ፤ ዬያ ቢያ ዒንሢ ማሊ ጳቂሃያ ማዔቱ ዒንሢ ዓውሳኒ ታኣኒ ማዶ ባኮ ቢያ ዒንሢ ዔራንዳኔ» ጌዔኔ።

ናንገና ናንገ ጎዳ ፔ ዳራፓ ኮዓ ባኮ

6 ጳኤፖ ያኣዛሢ ማዔ ናንገና ናንገ ጎዳሞ ዚጋኒ ሙካ ዋዶና ታኣኒ ዓይጎ ዔኪ ሸኢሹንዶይ? ሚቶ ዒንጎ ዒንገሢ ማዓንዳጉዲ ፔቲ ለዔ ማዔ ናኣሪ ዔኪ ሙኮንዶ?

7 ዓዳ ማራይ ሸያ፤ ሃንጎ ታጶ ሸያ ዋርዚ ዋኣሢጉዲ ማዔ ሪሚቶ ዛይቶ ቲኩ ዔኪ ታ ዒዛሞ ሸኢሹቱ ዒዚ ዋዛዳንዳና? ሃሃ ታኣኮ ዳቢንቶና ጎሞና ዛሎ ታኣኮ ናኣዚ ቶይዲ ሹኪ ዒዛሞ ሸኢሹንዶ?

8 ናንገና ናንገ ጎዳ ኮሺ ማዔ ባኮና ዒዚ ኔ ገዳፓ ኮዓ ባኮ ኔኤሞ ኬኤዙኔ፤ ዒዚ ኮዓሢ ፒዜ ማዔ ባኣዚ ኔኤኒ ማዳንዳጉዲ፥

6:4 ኬሲ. ማጻ 4:10-16፤ 12:50-51፤ 15:20። 6:5 ፓይ. ማጻ 22:2—24:25፤ ዓ.ያ. 3:1—4:19።

ኮሺ ባአዚ ማዲሢ ኔ ኮዓንዳጉዲ፣ ፆኦሲና ዋላ ጉቤ ዒናፓ ሼሌዔ ማዒሢና ሃንታንዳጉዲኬ።

9 ናንገና ናንጋ ጎዳ ዒጊጨሢ ዔራቶኬ፤ ካታሜሎም ዒዚ ሂዚ ጋዓኔ፡- «ዒንሢ ካታሜሎይዳ ቡኬ ዓሳ ዋይዙዋቴ!

10 ዒንሢ ፑርታ ባአዚ ማዲ ዓሳ! ጌኔ ጎይሢና ዒንሢ ዴንቄ ቆሎንታ ፒዜቱዋ ማኮ ባኮና ዒንሢ ቡኩሲ ዔኬ ሻኣካ ባኮ ታኣኒ ዋላንዳ?

11 ፒዜ ማዒባኣ ዴኤሠሞ ዔር ባኮ ዓርቄ ዓሢ፤ ገንሣ ሃሣ ፒዜ ማዒባኣ ማኮ ባኮ ዓርቄ ዓሢ ታኣኒ ዛገ ገባንዳ?

12 ፆርጎጮ ዓሳ ዒንሢኮ ዲቢ ጌኔ ማዲ ማዲያኬ፤ ካታሜሎይዳ ናንጋ ዓሳኣ ሉኡዙዋ ጌሰታኔ፤ ጌሺያ ዔያታ ጌሻኔ።

13 ዬያር ታኣኒ ዒንሢ ጎሞ ዛሎና ዒንሢ ባይዛኒና ዋዲያኣ ባይዛኒ ዔቄኔ።

14 ዒንሢ ሙዓንዳኔ፣ ሚሽካዓኬ፤ ናያ ዒንሢኮ ጋፓዓኬ፤ ዒንሢ ቡኩሳንዳኔ፣ ጋዓንቴ ዒንሢም ዴዓዓኬ፤ ዒንሢ ቡኩሴ ቆሎ ዓኣታቴያ ፆልዚና ታኣኒ ባይዛንዳኔ።

15 ዜርሢ ዒንሢ ዜርቃንዳኔ፣ ጋዓንቴ ሃኣኮ ዒንሢ ቡኩሲ ዔካዓኬ፤ ሪሚቶ ዓኣፖ ሂርቄ ዒንሢ ጨኡጸንዳኔ፣ ዛይቶ ተዙፊ ጋዓንቴ ዒንሢ ሙዓዓኬ፤ ዬያጉዲ ሃሣ ዋይኖ ዓኣፖዋ ሂርቃንዳኔ፣ ጋዓንቴ ዒንሢ ዬያ ዑዙ ዑሽካዓኬ።

16 ዬይ ቢያ ዒንሢ ሄላንዳሢ ካኣቲ ፆምሪኮ ዳምቦ ዒንሢ ኩንሄሥርና ካኣቲ ዓክዓቤ ዓሳ ማዲ ባኮ ቢያ ዒንሢ ማዲሢርኬ፤ ዔያቶ ዘር ዒንሢ ኩንሄሢር ታ ዒንሢ ባይዛንዳኔ፤ ዴርዋ ታ ዒንሢኮ ዓሲ ቢያ ቶኦቻያ ማሃንዳኔ።»

7

ዒሰራዔኤሌ ዴርኮ ፑርቲፆ

1 ዋይኖንታ ቤሌሶ ዓኣፖንታ ካፂ ማንፂንቴሰካፓ ሙዓኒ ኮዓ ዓኣፖ ዴንቃኒ ዳንዳዒባኣ ናይዴ ዓሲጉዲ ታኣኒ ማዒሢር ታና ባዴዔ! ታኣኒ ሙዓኒ ዓፃዲ ቤርታዲ ካፂ ቤሌሶ ዓኣፓ ባኣሴ።

2 ሳፆይዳፓ ጉሙርቄንታ ዓሲ ባይቄኔ፤ ፔቲታፆ ፒዜ ዓሲ ባኣሴ፤ ጉቤሢ ዓሲ ዋዲኒ ካታኔ፤ ዋለም፣ ፔቲይ ባጋሢኮ ገንፆ ሃንቴ ሃንቴ ፒር ፒራኔ።

6:16 1ካኣቶ. ማ 16:23-34፤ 21:25-26።

3 ኩጫ ዔያቶኮ ፑርታ ባአዚ ማዲሢ ዔሬያኬ፤ ቢታንታ ዓአ ዓሶንታ ዋጎ ዋጋ ዓሳአ ዴሜና ዔኮ ሚኢሹ ያኦጫኔ፤ ዋልቆሲ ፔ ኮዓ ባኮ ዋልቁና ማማዲሹሳኔ፤ ዬያይዲ ቢያሢ ዋጎ ዋቢሻኔ።

4 ዔያቶ ባአካ ሚርጌና ኮሺ ዓሲኬ ጌይንታ ዓሢ ዓዳ ዓንገሢጉዲኬ፤ ገንሣ ሃሣ ኮሺ ፒዜ ዓሲኬ ጌይንታሢያአ ሙጉሮጉዲኬ።

ናንገና ናንጋ ጎዳ ፔኤኮ ማሊያ ኬኤዛ ዓሶ ዛሎና ላቲ ኬኤዜ ጎይያና ፔ ዴሮይዳ ማቶ ዓጋንዳ ዋዴ ሙካንዳኔ፤ ሃይሾ፣ ሃሢ ዔያታ ዓአ ጎይያ ዲቃቲ ካራ ባይዚሢዳኬ።

5 ዓሲ ጉሙርቁፖ፤ ኔኤኮ ዑኬ ማዔ ለጋሢታቲያ ጉሙርቁፖ፤ ኔኤና ዋላ ላሃ ማቸሞታፖ ኔ ኬኤዛ ባኮ ዔሪ ኬኤዛንዳያ ኮይሳኔ።

6 ዬኖ ዋዶና ዓቲንቆ ናዓ ፔኤኮ ዓዶ ቶኦቻንዳኔ፤ ዉዴሮ ናዔላ ፔ ዒንዶ ዑፃ፣ ናአዚ ማቻአ ዓሆይዳ ሞርኬ ማዒ ዔቃንዳኔ፤ ዓሲኮ ሞርኬ ማዓንዳሢ ፔኤኮ ማአሮ ዓሶኬ።

7 ታኣኒ ጋዓንቴ ናንገና ናንጋ ጎዳይዳ ሃጋአ ዋዛ ጌሣንዳኔ፤ ታና ዓውሳ ያኦዛሢያ ታ ካፓንዳኔ፤ ዒዚ ታአሞ ዋይዛንዳኔ።

ዳቂንታ ናንገና ናንጋ ጎዳፓ ማዔሢ

8 ታ ሞርካሢየ! ታኣኒ ሎኦሚያታቲያ ገንሣ ታኣኒ ዔቃንዳሢሮ ታ ሎኦሚያና ዋዛዲፖ፤ ሃሢ ታኣኒ ዲሚዳታቲያ ናንገና ናንጋ ጎዳ ታአሞ ፖዓኔ።

9 ታኣኒ ናንገና ናንጋ ጎዳሞ ዋይዞ ዒፃ ዳቤሢሮ ዒዚ ታአሞ ዔቁ ዋጋንዳያ ሄላንዳኣና ዒዛኮ ጎሪንቶ ገቢ ታ ዳንዳዓንዳኔ፤ ዒዚ ታና ፖራ ባንሢ ኬሳንዳኔ፤ ታ ዒዛኮ ፃሉሞ ዛጋንዳኔ።

10 ታ ሞርካ ዬያ ቢያ ዛጋንዳኔ፤ «ናንገና ናንጋ ጎዳ ማዔ ኔ ያኦዛሢ ዋካ ዓአይ?» ታና ጋዓ ታ ሞርካ ቦርሲንታንዳኔ፤ ታኣኒያ ታ ሞርካ ሎኦሚሢ ዛጋንዳኔ፤ ጎይሢ ዓቺዳ ዓአ ቶርጾጉዲ ዒ ሄርቁንታንቴያ ታኣኒ ዛጋንዳኔ።

11 ዒንሢ ዬሩሳላሜ ዴራ! ካታሜሎኮ ኬኤሎ ዲፃ ኮሺንታንዳ ዋዴ ሙካንዳኔ፤ ዬኖ ዋዶና ዒንሢ ዋይሢ ዓጫ ዳልጋንዳኔ።

12 ዒማና ዴራ ዒንሢኮ ዒንሢ ባንሢ ማዓንዳኔ፤ ዬይያ፡- ዓባ ኬሰካ ባንፃ ዓአ ዓሶኦሬፓ፣ ዶኦሎ ባንፃ ዓአ ገብፃፓ፣ ዔፕራፃሴ ዋሮ ዓጮይዳፓ፤ ዬያጉዲ ሃሣ ሃኬፓ ባዚና ዴካና ቲቁ ዔያታ ሙካንዳኔ።

13 ዓጩላ ጋዓንቴ ዒዛይዳ ናንጋ ዓሶኮ ፑርቱሞፓ ዔቁያና ዓሲ ናንጉዋ ዳውሎ ማዓንዳኔ።

7:6 ማቲ. 10:35-36፤ ሉቃ. 12:53።

ናንገና ናንጋ ጎዳ ዒሰራዔኤሌ ዓሶ ሚጪንቴህ

14 ካዮ ባአኮይዳ ማኣታ ዋርቂ ዓኣ ቦኣላ ፔኤሮ ናንጋ፥ ኔ ቆልሞ ማዔዘንህ ኔኤኒ ኔ ቢታንቶና ሄንቄ፤ ዓዳ ሚናኣ ዋደጉዲ ባኣሳኔና ጌለዓዴ ዓጮናይዳ ዔያታ ሄንቆንጎ።

15 ጊብፆ ዓጪፓ ኔ ኦና ኬሴ ዋደና ማዳ ጎይፆ ኔ ዋልቆና ማዲንታ ዓኮ ባኮ ኦና ዳዌ።

16 ዔያታ ዋልቁና ዓኣ ዓሲ ማዔያታቲያ ዬያ ዛጊ ዔያታ ቦርሲንታንዳኔ፤ ዔያታ ፔኤኮ ኩጮና ዳንጎ ዓርቃንዳኔ፤ ዋዮዋ ዔያታ ቱጫንዳኔ።

17 ሸኣሺንታ ሜሌ ዳደና ጎቹንቲ ሃንታ ማዢንቶጉዲ ዓጪ ዔያታ ሙዓንዳኔ፤ ዔያታ ፔኤኮ ዋርዲዮ ቤዛፓ ኬሰኪ ጎጋይቂ ጎጋይቂ ሙካንዳኔ፤ ዔያታ ዒጊቹሞና ናንገና ናንጋ ጎዳ ማዔ ኦ ፆኦዛህ ባንህ ዬዓንዳኔ።

18 ጎሚ ዓቶሞ ጋዓያ፥ ፒኢጫዲ ዓቲ ኔ ዴሮኮ ዳቢንቶ ዓርቁዋያ፥ ኔናጉዴያ ፆኦሲ ያናዳይ? ማኣሪህ ኔና ዋዛሳያታህረ ዳጋ ኔኤኮ ናኣናና ጋፑዋፆ ዳዓያቱዋሴ።

19 ኔኤኒ ጊንህ ሚሚጫንታያኬ፤ ኦኤኮ ዳቢንቶ ኔኤኒ ኔ ቶኮ ዴማ ኬኤሪ ሄርቃኔ፤ ጎሞ ኦኤኮ ቢያ ዳኤፖ ባዘ ዔቶይዳ ኔኤኒ ዓጋኔ።

20 ኦኤኮ ቤርታኣ ዓድንህሞ ኔኤኒ ጫኣቂ ጎይፆና ዓብራሃሚንታ ያይቆኦቤንታ ዜርፆሞ ኔኤኮ ጉሙርቂንቲፆና ናንገና ናንጋ ናሹሞዋ ኔኤኒ ቤኤዛኔ።

ጌሌዢ ማጻሕፍት
The Holy Bible in the Maale language of Ethiopia,
using Ethiopic script

copyright © 2008 The Word for the World International and The Bible Society of Ethiopia

Language: Maale (Male)

Translation by: The Word for the World

Contributor: Bible Society of Ethiopia

ጌሌዢ ማጻሕፍት

Maale Full Bible

The Word For The World International

Bible Society of Ethiopia

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

PDF generated using Haiola and XeLaTeX on 13 May 2025 from source files dated 13 May 2025

bbcfb90a-3ae3-5452-983d-6c4c02375929